



NCAV TES NROG KEV KHUV LEEJ

Thaum nej coj raws li tus Cawm Seej tus yam ntxwv muaj kev khuv leej, nej yuav paub hais tias nej pab tau lwm tus lub neej.

Kev khuv leej yog kev paub txog lwm tus tej kev txhawj xeeb thiab yog kev xav pab los yog kev ris lawv tej nra. Kev khi lus coj raws li tus Cawm Seej yog kev khi lus hais tias peb yuav muaj kev khuv leej peb thiaj li “ib leeg txaus siab ris ib leeg tej nra” (Mauxiyas 18:8). Kev txib saib xyuas lwm tus yeej yog lub cib fim txhawb pab lawv zoo li tus Tswv yuav ua: nrog kev khuv leej, thiaj li pab tau (saib Yudas 1:22). Tus Tswv txib hais tias, “Nej yuav tsum ua siab dawb siab zoo thiab ib leeg hlub ib leeg” (Xakhaliyas 7:9).

Tus Cawm Seej txoj Kev Khuv Leej

Kev khuv leej yog ib qho tseem ceeb nyob hauv tus Cawm Seej txoj hauj lwm qhuab qhia (saib qhov hu ua: “Ib tug Cawm Seej uas Khuv Leej”). Muaj ntau zaas uas Nws txoj kev khuv leej rau Nws cov neeg ua rau Nws xav ncav tes pab cov uas nyob ib puag ncig Nws. Vim Nws paub tias tib neeg xav li cas thiab xav tau dab tsi, Nws paub ua li cas kom foom koob hmoov rau lawv thiab

siv tej txheej txheem qhia lawv uas yuav muaj nqis tshaj plaws rau lawv. Tus Cawm Seej txoj kev xav txhawb nqa peb kom tsis raug kev nyuaj siab ua rau Nws ua qhov uas muaj kev khuv leej loj tshaj plaws: Nws txoj Kev Theej Txhoj kom kov yeej tib neeg tej kev txhaum thiab kev txom nyem.

Qhov uas Nws txawj pab tib neeg raws li lawv xav tau yog ib qho uas peb yuav tsum muaj siab xav ua thaum peb pab lwm tus. Thaum peb ua neej ncaj ncees thiab mloog tus Ntsuj Plig tej kev tshoov siab, peb yuav paub ua tej yam tseem ceeb kom ncav tes pab lawv.

Peb txoj Kev Khi Lus ntawm Kev Khuv Leej

Peb Leej Txiv Saum Ntuj Ceeb Tsheej xav kom Nws cov me nyuam muaj kev khuv leej (saib 1 Kaulethaus 12:25–27). Yog peb yuav ua cov thwj tim tiag tiag, peb yuav tsum muaj kev khuv leej rau lwm tus, qhov tseem ceeb yog cov neeg uas xav tau kev pab (Q&K 52:40).

Thaum peb khi lus tias peb yuav ris Yexus Khetos lub npe thaum peb ua kev cai raus dej, peb qhia tias peb txaus siab muaj kev khuv leej. Thawj Tswj Hwm Henry B. Eyring, tus Pab Cuam thib Ob hauv Thawj Pawg Thawj Tswj Hwm, tau qhia hais tias lub txiaj ntsim Vaj Ntsuj Plig Dawb Huv pab peb ua li ntawd: “Nej yog cov mej zeej ntawm Yexus Khetos lub Koom Txoos. . . .

“Qhov no yog vim li cas nej xav pab ib tug neeg uas ris nra hnyav vim nws nyuaj siab thiab raug teeb meem mus tom ntej. Nej tau cog lus tias nej yuav pab lawv kom lawv tej nra yuav sib thiab lawv yuav txais kev nplij siab. Nej tau txais lub hwj chim kom pab ua rau tej nra no sib thaum nej tau txais lub txiaj ntsim Vaj Ntsuj Plig Dawb Huv.”¹

Piv txwv hais tias, ib tug muam nyob hauv Russia muaj xwm txheej hauv nws tsev neeg uas ua rau nws tuaj tsis tau rau lub koom txoos ntev dua li ib xyoos. Ib tug muam ntxiv nyob hauv ceg ntseeg ntawd twb muaj kev khuv leej pab nws txhua Hnub Caiv thaum uas tus muam no hu nws qhia nws txog tej zaj lus uas tib neeg hais thiab qhia, leej twg yuav mus ua tub txib, qhia txog cov me nyuam uas nyuam qhuav yug los, thiab lwm yam hauv nws ceg ntseeg. Thaum tus muam uas yuav tsum nyob hauv tsev nws tsev neeg qhov teeb meem twb daws lawm, nws xav tias nws tseem koom siab nrog ceg ntseeg ntawd vim tias nws tus phooj ywg hu tuaj rau nws txhua lub lim tiam.

LUS CIM

1. Henry B. Eyring, “The Comforter,” *Liahona*, Tsib Hlis Ntuj 2015, 18.

PLAUB YAM UAS PAB YUS MUAJ KEV KHUV LEEJ

Txawm tias feem ntau peb muaj kev khuv leej ntxiv tom qab peb raug peb tej kev sim siab, muaj tej yam uas peb ua tau hnub no kom muaj kev khuv leej ntxiv. Cia li xav seb koj yuav ua li cas kom ua raws li plaub lub ntsiab cai no:

Thov Vajtswv kom muaj kev khuv leej. Thaum koj thov Leej Txiv Saum Ntuj Ceeb Tsheej, Nws yuav qhib koj lub siab, thiab “koj yuav pib txhawj txog lwm tus neeg txoj kev tau zoo thiab txoj kev zoo siab nyob mus ib txhis” (*Qhia Kuv txoj Moo Zoo:*

Phau Ntawv Qhia cov Tub Txib [2004], 118; kuj saib Maulaunais 7:48).

Xyaum muaj kev khuv leej. Koj yuav muaj kev khuv leej thaum koj mloog thiab to taub. Cia li xav tias yuav zoo li cas yog koj muaj lawv lub neej thiab xav seb lawv yuav xav li cas. Yog tias tsim nyog rau lub sij hawm thiab qhov xwm txheej ntawd, tej zaum koj yuav xav thov pab txhawb nqa lawv thaum lawv raug mob, raug txom nyem, los sis raug teeb meem.

Ua raws li kev tshoov siab. Tus Tswv qhia tau tej kev hlub lwm tus uas peb tsis paub ua yog peb ua peb tus kheej xwb. Thaum tus Ntsuj Plig tshoov koj lub siab kom pab lwm tus, tsis txhob tos ua li ntawd.

Ua ib tug phooj ywg rau lawv. Muaj kev khuv leej yeej yooj yim npaum li qhov uas yus xav paub tiag tiag txog lwm tus neeg lub neej. Learn to listen well (saib “Tej Ntsiab Cai txog Kev Txhawb Pab: Tsib Yam uas cov Neeg uas Mloog Zoo Ua,” *Liahona*, Rau Hli Ntuj 2018, 6–9). Koj txoj kev hlub lawv yuav loj tuaj, thiab yuav yooj yim dua kom paub tej yam koj ua tau qhia tias koj hlub lawv.

IB TUG CAWM SEEJ UAS KHUV LEEJ

Cia li xav seb puas xav kawm txog tej nqe vaj lug kub no kom paub tias Yexus Khetos txoj kev khuv leej ua rau Nws xav kho, foom koob hmoov, thiab qhia cov neeg nyob ib puag ncig nws thaum Nws ua Nws txoj hauj lwm qhuab qhia: Mathais 9:35–38; 14:14; 18:27, 33; 20:30–34; Malakaus 1:40–42; 5:19; 6:30–42; 9:22; Lukas 7:13; 10:33; 15:20.

Tej ntsiab cai txog kev txhawb pab yog tej uas yuav pab peb ib leeg kawm saib xyuas ib leeg—tsis yog yuav siv kom qhia ib zaj lus. Thaum peb paub cov uas peb pab, tus Vaj Ntsuj Plig Dawb Huv yuav tshoov peb lub siab kom paub tias lawv xav tau zaj twg ntxiv rau peb txoj kev saib xyuas thiab txoj kev khuv leej.